

Scott Ticknor

Chargé d'Affaires

U.S. Embassy Dili, Timor-Leste

30 Juñu 2014



Proteze Liberdade Imprensa

Iha Estados Unidus, Liberdade Imprensa mak komponente fundamentál ida ba ami nia prinsípiu demokrátiku, konsagra iha Primeira Emenda ami nia konstituisaun nian. Tanba saida mak liberdade mídia ne'e importante tebes? Nu'udar artigu 19 husi Deklarasaun Universal Direitus Umanus nian hatete, *"ema hotu iha direitu ba liberdade ho nia opiniaun no espresaun; direitu ida-ne'e inklui mós liberdade atu rai nia opiniaun laho interferénsia, no atu buka, simu no fahe informasaun no ideia sira liu husi mídia ne'ebé de'it no la haree ba fronteira sira."* Informasaun mak poder. Ema uitoan bele hetan moris, mantein sira nia governu atu iha responsabilide, no eduka sira-nia oan sira sein iha fonte informasaun ne'ebé mak fluksu ho livre. Sidadaun sira presiza notícia loloos, atuál, independente ne'ebé sira bele fiar. Nune'e mós negósiu no merkadu sira. No nune'e mós governu.

Liberdade mídia mantein sosiedade no ekonomia sira moris nafatin, enerjétiku, no saudavel. Wainhira fluksu notícias no informasaun livre hetan restrisaun, individual sira mak sofre. Sosiedade sira mak sofre. Ekonomia sira mak sofre. Hanesan Presidente Obama hatete, *"Istória hatudu katak ingrediente ida ba sosiedade sira ne'ebé susesu, prósperu no hakmatek mak imprensa ida ne'ebé livre iha ne'ebé sidadaun sira bele iha asesu ba informasaun ho livre no mantein sira nia governu sira atu sai responsavel."*

Iha fulan kotuk, mundu celebra Loron Liberdade Imprensa Mundial nian, no Estados Unidus bolu atensaun husi governasaun hotu-hotu atu hola medida sira ne'ebé presiza atu kria fatin ba jornalista independente sira atu hala'o sira nia servisu laho ta'uk ba violénsia no persegisaun. Maibé liberdade imprensa la'ós buat ne'ebé mak tenke komemora no hahi'i loron ida de'it iha tinan ida nia laran – ida ne'e direitu kada loron ba loron nian – no ita onra papél mídia ne'ebé livre no independente iha kriaun demokrasia ne'ebé sustentável no sosiedade ne'ebé nakloke no saudavel.

Jornalista ida nia papél mak nu'udar provedór, protetór ba guarda sira. Se imprensa livre ida la halo sira ne'ebé iha poder sai responsavel, entaun sidadaun sira dala-barak la iha alternativa. Jornalista naran boot Amerikanu ida, Edward R. Murrow, hatete, *"Ita labele konfunde diskordánsia ho infidelidade."* Ita mós labele konfunde pozisaun política ho hateten lia-loos. Patriota boot sira mak dala-ruma sidadaun sira ne'ebé iha hanoin ne'ebé krítiku liu.

Estados Unidus apresia Timor-Leste nia reputasaun internasionál ne'ebé forte hodi defende demokrasia no respeita direitus umanus. Iha tempu ne'ebé Timor-Leste konsidera lei mídia foun, ami hamriik ho sidadaun Timor oan sira ne'ebé hatene no respeita papél liberdade imprensa ida nu'udar fundamentu ba prinsípiu demokrátiku ne'ebé ita nia nasaun rua ne'e louva.

###